

重陽分梨十化集卷下

終南山重陽子王嘉撰

黃鶴洞中仙

你待堅心走 我待堅心守 栗子甘甜美芋頭 翁母同張口  
開取四時花 綻取三春柳 一性昭然全得他 玉液瓊漿酒

丹陽繼韻

不敢心狂走 極謝師真守 芋栗今番六次餐 美味常甘口  
不作東牟叟 不戀東風柳 參從風仙物外遊 共飲長生酒

黃河清

根固源澄宜鎖戶 清清堅守深洞

轉加溫煖 悉屏嚴凝寒凍

別是風流雅致 頓知得超昇管中

得自然開悟 長生遇 玉花正好拈弄

元初本有真靈 明明處 這迴搜見鉛汞

便令結就 一粒金丹堪貢

顯現祥光瑞耀 更來往 隨鸞引鳳

重陽分梨十化集 卷下

清微藏書閣

十洲三島 神仙喜慶迎共班

丹陽次韻

師父專專封閉戶 非干固濟雲洞

亦非誇銜 能受三冬飢凍

為我愚頑戀俗 用機化玄言必中

等待子自悟 知其遇 捨家物外拿弄

怡然頓覺元初 捐塵累 便烹鉛更烹汞

於澄湛中 保養神珠為貢

直待功成行滿 恁時節 攜雲跨鳳

赴蓬萊島 仙童遠遠來迎挺

憶王孫

分明七寶更休論 七座門開各有門 一四一三各彼吞

返陽魂 便是長生保命存

丹陽繼韻

風仙師父妙談論 說透無為清淨門 舌上甘津味得吞

溉精魂 陰裏陽生萬劫存

玉京山

失笑迷陰化不來 頑愚心鎖硬 怎生開  
直饒富貴沒殃災 天年限 終久落輪迴  
鬼使早相催 兒孫難替得 有何推  
恁時悔恨哭聲哀 方知道 學道是仙材

丹陽又韻

慷慨男兒跳出來 名韁并利鎖 豁然開  
宜乎了幹死生災 超彼岸 休望再頭迴  
師父教言催 道裝當結裏 役心推  
任教妻子哭哀哀 關西去 做箇駕雲材

臨江仙

栗子味招全道子 芋頭滋味引迴頭  
各人喫了並無憂 四三通十二 箇箇下重樓  
喫得過時冰是水 水中兩點浮漚  
一來一去幾時休 若教同我願 管取得真修

丹陽總韻

重陽分梨十化集 卷下

清微藏書閣

大悟立身蓑笠好 遇投相應迴頭  
訓予全道號無憂 慧眸觀玉洞 雲步上瓊樓  
赤鴈頭鑽清晏地 白鷗足捧浮漚  
兩般混合最休休 要除三界苦 堪把一靈修

黃河清 按一百八數

九曲黃河分九轉 洪波大浪清淨  
九江共同 合就俱來歸正  
九鼎中間顯現 九宮闈 端流一定  
玉翻金潑盈盈處 倒侵九曜開影  
九霄翠碧相齊 九皋有 鶴鳴迎接精瑩  
九光洞明 返照靈輝堪並  
九曲神珠跳躍 九仙至 如然游泳  
湛禪澄徹 成功行九天通聖

丹陽繼韻

九曲黃河流轉九 陽陰逆順情淨  
九池之內 涌出龍泉端正

九會互初湛寂 九關現 靈波永定  
美芝祥瑞天然秀 九莖自是無影  
九霞覆鼎澄輝 九還火 鍊神丹轉光瑩  
九玄祖先 要救攀仙肩並  
九九重陽口訣 暗傳得 非凡游泳  
累真功行 將來去九霄參聖

臨江仙

八卦分明鋪擺定 二人各四陽陰 中間玄妙細搜尋  
若能知此味 便是得真金  
恬淡隱藏清與淨 甜甜卻顯佳音 八都山上出高岑  
正當堪眺望 方是好登臨

丹陽次韻

八識通知心已定 遍觀物物皆陰 不如留意則追尋  
水中閑養火 玉內要生金  
直待陽純丹不漏 憑時可稱知音 超然雲步上瑤岑  
不勞極目望 自見好光臨

重陽分梨十化集 卷下

清微藏書閣

詩與丹陽

百日烏門意已投 定須堪可作朋儔  
馬猿返性緣攀戀 桃杏為人也害羞  
從此果能成決斷 端然真箇好因由  
撐篙已在中流裏 難下逍遙得岸舟

丹陽繼韻

今朝誓狀謹相投 做箇灰心物外儔  
鍊氣頤神常有樂 上街展手略無羞  
擘開世網歸真趣 跳出樊籠得自由  
參從本師雲水去 逍遙坦蕩駕神舟

絕句

謾說修行學大道 切須先向身中考  
勸公第一莫多情 天若有情天也老

丹陽次韻

得遇明師歸正道 迴光返照心頭考  
自然開悟絕塵情 箇內修完仙不老

莫思鄉 贈丹陽

栗子味堪收 更出馨香是芋頭  
今後喫時思想定 追求 為甚般般各六籌  
細認細尋搜 芋有青苗粟有鄒  
空外地中歸一處 休休 說破玄玄你越愁

丹陽繼韻

意馬下功收 不放心猿暫出頭  
一點靈明歸太素 何求 通六幽微罷運籌  
芋栗更閑搜 知味聞香識破鄒  
須向空中尋響噫 無休 真樂真歡散盡愁

贈孫姑

在家只是二婆呼 出得家緣沒火鑪  
若會修行成鍛鍊 教人永永喚仙姑

望蓬萊

逢九變 逢九變 須用寶刀裁  
陰魄莫隨魔鬼轉 陽魂合趕好梨來

重陽分梨十化集 卷下

清微藏書閣

今已免輪迴 公聽取 公聽取 道眼正堪開  
四假身軀宜鍛鍊 一靈真性細詳猜 有分看蓬萊

丹陽次韻

通真九 通真九 箇內下功裁  
便使龍蛇騰地去 卻教雲鶴下天來  
晨看暮潮迴 白蓮綻 白蓮綻 自有碧蓮開  
清淨門中通出入 無為路上免搏猜 定是到蓬萊

虞美人

丹陽問余 不住飲冷水 何故 答曰 我自甘河得遇純陽真人

因飲水焉 故作是詞

害風飲水知多少 因此通玄妙  
白麻衲襖布青巾 好模好樣真箇好精神  
不須鏡子前來照 事事心頭了  
夢中識破夢中身 便是逍遙達彼岸頭人

丹陽繼韻

馬風得遇心塵少 通得玄中妙  
自然恥戴皂羅巾 真息綿綿營養不神神

慧燈不住通天照 性命須當了  
金鑪便是鍊丹身 坦蕩逍遙做箇散閑人

### 蕊珠宮

栗子二三箇 法這芋頭的端六箇  
分付清閑唯兩箇 尋思箇 甘甜味 怎生箇  
五臟明明箇 又六腑 不差些箇  
更有金丹此一箇 十二箇 請翁婆 會則箇

### 丹陽繼韻

芋栗又分六箇 遇投三 謂懷真箇  
立子三人總忘箇 細搜尋 就中認 箇中箇  
性月圓圓箇 真歡樂 不愁些箇  
或問扶風因甚箇 報君知 捨那箇 得這箇

### 贈丹陽

莫慮王風冷 王風自不寒 百朝歎地過 出路你咱看

### 丹陽繼韻

有漏常愁冷 無情不覺寒 要通雲外境 捨俗慧眸看

## 重陽分梨十化集 卷下

清微藏書閣

### 感皇恩

百日鎖庵門 分梨十化 閑閑澄中 淨養真假  
箇人嘆問 直受如斯瀟灑 我咱知得也 誠清雅  
別有一般 分明好畫 頻頻親擎出 暫懸挂  
那懣要看 萬斛珍珠酬價 想時傳說下 些兒話

### 丹陽次韻

鍾呂遣風仙 專行教化 故鎖庵門 □即非假  
用機誘我 暗剔靈明惺灑 脫家風狂做 棄儒雅  
真箇內容 難描難畫 六銖衣光彩 體披掛  
手擎丹顆 瑩瑩光明無價 蓋因傳得些 非常話

### 報師恩

為何不倦寫詩詞 這箇明因只自知  
一筆書開真正覺 三田般過的端慈  
迴光返照緣觀景 固蒂深根恰及時  
密鎖玄機牢閉戶 喚來便去赴瑤池

### 丹陽次韻

今朝跪領本師詩 秘密玄機喜得知  
勘破萬緣忘假相 滌除六慾起真慈  
男婚女嫁休心日 意滅情忘捨俗時  
恭從吾師雲水去 將來決定到天池

### 贈丹陽

酒初醒 夢初驚 月初明 性初平  
如覺悟 是前程

### 丹陽次韻

醉中醒 睡中驚 暗中明 箇中平  
心開悟 得前程

誓丹陽子孫入道 七祖出離地獄  
子孫得道 九祖生天 如退道 累祖先

### 悟南柯

芋栗今番徹 賢愚兩共餐 一能陽氣做團團  
一箇沉淪 陰魄愈摧殘 來者歸清淨 迷人俗冗盤  
通全跳入好仙壇 恰恰同居 吉吉永相看

## 重陽分梨十化集 卷下

清微藏書閣

### 丹陽次韻

立遇心通徹 清香味得餐  
水中紅焰結成團 雪裏瓊花 爛漫不凋殘  
性燭明金闕 神丹晃玉盤  
齊修六度與三壇 出自吾師 內景自然看

### 絕句

二婆只識世間居 不識蓬瀛有玉壺  
若肯迴頭修覺悟 名傳永永喚仙姑

### 玉堂春

玉性金真 人人皆可化 玉液金丹 頻頻迎迓  
玉兔金烏 光光相次亞 照玉欄杆 種玉芽  
玉蕊金莖 長長生不謝 玉女金童 常常看舍  
玉鎖金匙 門門開闡下 賞玉堂春 對玉花

### 丹陽繼韻

玉悟金通 心心從教化 玉虎金龍 時時相迓  
玉灩金波 澄澄成次亞 見玉溪中 產玉芽

玉葉金枝 榮榮無朽謝 玉姹金嬰 閑閑看舍  
玉戶金關 明明開上下 唱玉堂春賞玉花

重陽真人分梨十化集卷下竟

天運壬辰年申月正一天師清微弟子洪鼎堅率門人

羅大英 安羅飛恭錄彙編

重陽分梨十化集 卷下

清微藏書閣